


Lu Palazzu di Baldu



Lu Palazzu di Baldu s'agatta illu tirrittóriu di Locusantu, accultu a la 'jésgia di Santu Stévanu. Lu fraichésini ill'Etai di Mezu e facia palti di lu Gjudicatu di Gaddura. Lu 'judicatu éra divisu in diffarenti curadurii e tra chisti v'éra chissa di Balajana, chi cumprindia la “Villa de Sent Steva”.



Lu complessu di lu Palazzu di Baldu è mannu 1.379 m² e è fattu da una turra principali a folma cuadrata e da guasi vinti casi chi ingjiriàani la colti a cincu lati, chi aia l'intrata da lu latu chi dà a tramuntana e lianti. La turra, posta illu biccu chi dà a mezudì e a lianti, abali è longa guasi déci metri, ma in orìgini di' esse stata più longa.



Éra fulmata da tre piani, cu' una tarrazza chi assigura la 'ista innantu a tuttu lu tirritóriu chi v'éra intundu. In dugna pianu v'érani di li balconi, e li scalini a la palti di fora palmittàni d'intrà direttamenti a lu pianu nóbbili di lu stàbbili. La palti a pianu tarrenu è stata fatta cu' un basamentu dittu “a scarpa”, tipologia edificativa típica di li castéddi o di li turri pa' scoppu di difésa, chi comu vidimu è un pocu di sbasginu. Indrentu agattemu un monti mannu.





Illu latu chi dà a punenti agattemu di li conchi naturali chi pudìani esse trattati com'e prutizioni o com'e staddi pa' l'animali. Tutt'intundu a la turra so stati agattati dicessetti stànzii di folma rettangolari, cun mannuri diffarenti, chi pudìani esse casi, camasini, cucini, staddi e bruttéi d'altisgianatu. Chistu faci pinsà chi lu Palazzu éra una "curtis", saria a dì un modéllu ulganizzativu tìpicu di li campagni di la Saldigna e di l'Itàlia di l'Etai di Mezu.

La paràula arréa da lu latinu e vó dì “colti” o “fattoria” e faci riferimentu a una palti di tirrittóriu cu’ la casa di lu patronu di lu lócu chi aia un controllu económicu e sociali di tutta la zona. Dunca lu Palazzu di Baldu éra un lócu impulanti pa’ l’amministrazioni di lu tirrittóriu e probabilmenti éra una sedi istituziunali di lu Gjudicatu di Gaddura.



A fóra da lu complessu di li casi, illu latu chi dà a punenti, pal mezu di li stùdii so stati agattati palti di muri chi si collegàani a la 'jésgia di Stantu Stévanu, turrata a fraicà probabilmente tra lu XVII e XVIII séculu innantu a chissa più antica di l'Eta di Mezu, chi éra a silvìziu di la 'idda chi pultaa lu mattessi nommu ("Sent Steve"). Abali lu stàbbili à una stànzia ùnica cu' la cupaltura a dui ei, orientata a lianti, ancóra siddu chi no à l'àbsidi.



